

Turkiston

1925-yildan chiqqan boshlagan

«Kamolot» yoshlar ijtimoiy harakati Markaziy Kengashining nashri

www.turkiston.uz

2013-yil 9-fevral, shanba № 11 (15649)

Navqiron avlod so'zi

Фаоллик — ҳаётим мазмуни

Тадбиркор, хунарманд, фермер... Уларнинг ишига ҳавас қилмайдиган одамнинг ўзи йўқ ҳозир. Турмушимиз фаровонлигини таъмин этувчи бу касб эгалари ичида ёшлар, яъни менинг тенгдошларим ҳам кўпчиликни ташкил этади.

1991 йил — мен туғилган йил. Аввало, мустақилликка тенгдош эканлигимдан фахрланаман. Мен мустақиллик нафаси билан улғайдим. Илгариги даврда хотин-қизлар қанчалик оғир шароитда ишлаганини устозларимдан, уйдагилардан жуда кўп эшитганман. Эндликда эса ундай эмас. Қизларимиз ўзларидай нафис, нозик ишларни бажармоқда. Аёл қўли билан яратилган тикувчилик, каштачилик, зардўзлик маҳсулотлари нафақат юртдошларимизни, балки хорижликларни ҳам ҳайратга солмоқда.

Ёшлигимдан тикувчиликка меҳрим бўлакча эди. Шу боис маҳалламиздаги Дилдора опа деган тикувчига шогирд тушдим. Кўп вақтимни унинг ёнида ўтказардим. Бир-икки тиккан нарсам яқинларимга маъқул келди шекилли, бошқалар ҳам менга кийим-кечак тиқиш учун буюртма бера бошлашди. Жиззах уй-жой коммунал хизмат кўрсатиш касб-хунар коллежида ўқиб юрганымда Ҳаракатнинг Жиззах шаҳар кенгаши фаолига айландим. Шунда «Севара-нур» устоз-шогирд мактабини очдим ва жамғарган пулларимга бир нечта тикув машиналари сотиб олдим. Вилоят «Камолот»чилари мени турли танловларга қатнашишга тавсиялар бериб туришди. Ёш бўлсам ҳам англаганманки, тадбиркорлар жамиятнинг илғор қатламига кирар экан. «Ташаббус» кўрик-танловининг Жиззах шаҳар босқичида 2011 йил «Энг ёш тадбиркор» номинациясида, 2012 йил эса «Энг ёш хунарманд» номинациясида фахрли ўринларни эгалладим. Шундан сўнг меҳнатсеварлик, жамоат ишларида фаоллик, ижтимоий лойиҳаларда фаол иштирок этиш фаолиятимнинг асосий мазмунига айланди. Ана шу ҳаракатларим натижаси бўлса керак, 2011 йилда «Меҳр нури» жамғармасининг кичик ва ўрта тадбиркорлик, фермерлик фаолиятини ривожлантиришга қаратилган грант дастури қолиби бўлдим.

Мен янги тикув машиналари олишни ният қилиб юрардим. 2012 йилда «Ипотекабанк»нинг Жиззах вилояти филиалидан ўн миллион сўм кредит олиб, «Ямата» русумли тикув машиналари ва бошқа керакли қўшимча жиҳозларни харид қилдим.

Республикамиз ва вилоятимиз миқёсида ўтказиб келинаётган турли кўргазмаларда иштирок этаман. Айниқса, бандлик ярмаркасида коллеж битирувчиларини ўз фаолиятим билан таништирганимда, уларда тадбиркорликка қизиқиш ортганини кўриб қувонаман. Ахир, юртимизда тадбиркорлар кўпаявергани яхши-да. Ўзимизнинг устоз-шогирд мактабида маҳаллалардаги кам таъминланган оилаларнинг фарзандларига, қолаверса, ишсиз хотин-қизларга тикувчилик сир-асрорларини бепул ўргатяпмиз. Бу билан биз оилавий бизнесни ривожлантиришга ҳисса қўшган бўламиз.

Мен очган мактабда етти нафар қиз иш билан таъминланган. Матлуба Усмонова, Гавҳарой Тўрақулова, Мавлуда Исломова каби қўли гул шогирдларим коллежни битириб, шу ерга ишга жойлашди. Ҳозир улар миллий либослар, келинлик либосларини кўзни қувнатадиган даражада тикишмоқда. Буларни кўриб нафақат мен, уларнинг оиласидагилар ҳам қувонишади.

Оилавий бизнес, яхши хунар турмуш фаровонлигига омилдир. Обод турмуш йилида ана шулар ҳақида ўйларканман, юртимиздаги барча дўгоналарим мана шу оддий ҳақиқатни, менимча, яхши англайди.

Севара ОЧИЛОВА,
«Ўзбекистон белгиси» кўкрак нишони соҳибаси



Сардор Муллажонов фотокорража

Oltin meros

Ватан каби мангу Навоий

Шу кунларда юртимизнинг барча ҳудудларида буюк бобокалонимиз, шоирлар султони Алишер Навоий таваллудининг 572 йиллигига бағишлаб кўплаб маданий тадбирлар, учрашувлар ва навоийхонлик кечалари ўтказилмоқда. Шундай тадбирлардан бири Тошкент давлат аграр университетида ҳам бўлиб ўтди.

Навоийхонлик бадий кечасида Олий Мажлис Сенати аъзоси, Ўзбекистон халқ шоири Маҳмуд Тоир, таниқли шоир Чоршамъ Рўзиев, Ўзбекистон Ёзувчилар уюшмасининг масъул ходими Мунаввара Усмонова иштирок этди. Тадбир меҳмонлари Навоий ижоди, унинг бебаҳо маънавий мероси ҳақида сўз юритиб, бобомиз

ғазалларидан парчалар ўқишди. Шунингдек, тадбир иштирокчиларига ўзларининг Навоийга бағишлаб битган шеърларини ўқиб беришди.

— Инсоният ҳаётида шундай шахслар бўладики, улар мангуликка дахлдордир, — дейди Тошкент давлат аграр университети ўзбек тили ва чет тиллар кафедраси мудирини,

филология фанлари номзоди, доцент Сайёра Холмирзаева. — Шундай сийтомолардан бири Алишер Навоийдир. Бу шахснинг дунёга келиши, адабиётнинг бахти, миллатнинг маънавий бойлигидир. Бугун ёш авлодни баркамол ва комил инсон этиб вояга етказишда Навоий бобомиз қолдирган бой маънавий мерос ўзига хос муҳим вазифани ўтапти. Университетимизда Алишер Навоийнинг сўнги асари саналган «Маҳбуб ул-қулуб» асари маънавий соатларида талабаларга чуқурроқ ўргатиляпти. Чунки панд-насихат, дидактик руҳда ёзилган ушбу

асарда маънавий қадриятлар, ҳалоллик, тўғрилиқ, тилга эътибор каби хислатларга кенг ўрин берилган. Бугунги тадбир ҳам шундай хислатларни тарғиб этишга қаратилган.

Тадбир давомида университет талабалари Навоийнинг адабий-бадий мероси ва ғазалларидан намуналар ўқиб, «Фарҳод ва Ширин» достонидан саҳна кўриниши ҳамда таънов рақсини намойиш этишди. Айниқса, инглиз, немис, рус тилларида ўқилган ғазаллар иштирокчиларда катта қизиқиш уйғотди.

(Давоми 3-бетда)

Ёшлик — бу орзу, ишонч ва жасоратга интилиш

Yoshlar anjumani

Мамлакатимиз ёшларининг кучли, билимли, доно ва албатта, бахтли бўлиб камолга етишлари учун Президентимиз Ислам Каримов раҳнамолигида беқиёс гамхўрликлар кўрсатилиб, зарур имкониятлар яратилмоқда. Ана шундай эътибор ва эъзозда, бахтли дилёр бағрида яшаётган миллат фарзандлари бугун қандай бўлиши керак? Ёхуд бугунги тараққиёт жараёнида ёшларнинг иштироки қандай? Не-не аждодлардан халқимизга мерос қолган энгилмас куч — маънавият билан боғлиқ долзарб масалалар йигит-қизларимизнинг ҳаётида қандай ўрин тутмоқда?

Яқинда Андижон, Наманган ва Фарғона вилоятлари ёшларининг вакиллари Наманганда йиғилишиб, «Камолот» ёшлар ижтимоий ҳаракати вилоят кенгаши ва «Фидойи ёшлар клуби» ҳамкорлигида анжуман ташкил этдилар ҳамда юқоридаги саволларнинг амалдаги жавобларини топмоққа интилдилар. Икки кун давом этган ва «Кучли тарғибот — юсак натижа» шиори остида ўтган анжуманда долзарб масалалар муҳокама этилди. Анжуман кун тартибидеги дастлабки масала — «Ёшлар тарбияси — келажак меваси» шиори остидаги мунозара Наманган муҳандислик-педагогика институти-

нинг «Олтин давр» мажмуасида бошланди. Олийгоҳдаги қизгин мунозара тадқиқот маърузаларини тинглаш ва мулоқотга киришишга уланди: наманганлик модераторлар Муҳаммаджон Убайдуллаев, Абдулазиз Мўминов, Анасхон Мамадалиев, Наргиза Жўраеванинг «Ахборот хуружи — ёшлар онгига таъсир: муаммо ва таклифлар» «Оммавий маданият: муносабат, таклиф, хулоса», «Диний экстремизм ва ақидапарастлик: тараққиёт ва комилликка хавф солувчи омил», «ОИТС, гиёҳвандлик, алкоголь ва тамаки маҳсулоти истеъмолсиз соғлом ҳаёт сари» сингари мавзуларда маъруза



Ҳотам МАМАДАЛИЕВ (ЎзА) олган сурат

қилиб, фарғоналик, андижонлик ёшлар, мезбонларни бахс-мунозараларга чорладилар. «Халқнинг бахт-саодати ёшларни тўғри тарбиялашга боғлиқ» номли биринчи кун мавзусидан кўнгли тўлган иш-

тирокчилар Наманганнинг диққатга сазовор жойларига, жумладан, «Баркамол авлод» спорт мажмуасига, «Камолот» ёшлар боғи»га ташриф буюрдилар. Шунингдек, бир қатор иншоотлардаги ободончилик ишлари,

шаҳарсозлик намуналари билан танишдилар. «Ёшлик — бу орзу, бу ишонч, бу жасоратга интилиш ва келажакдир» мавзусини қамраб олган анжуманнинг иккинчи кунда семинар-тренинглар ташкил этилиб, унда йигит-қизлар мафқуравий иммунитетни шакллантириш, диний экстремизм ва ақидапарастликнинг олдини олиш, «оммавий маданият» ва ахборот хуружларининг ёшлар дунёқарашига таъсири бўйича фикрлашдилар, ўзларининг мулоҳаза, таклифларини ўртага ташладилар.

Тадбир ниҳоясида матбуот анжумани ўтказилди. Уни Наманган давлат университети доценти Баҳриддин Талапов олиб борди. Ушбу анжуманда «Камолот» ЁИХ Наманган вилояти кенгаши раиси Жаҳонгир Нодиров, Андижон давлат университети проректори А.Собилов, Фарғона давлат университети талабаси, Зулфия номидаги Давлат мукофоти соҳибаси Д.Қўлдошева сўзга чиқди. Якуний маросимда «Энг яхши мақола», «Энг яхши таклиф ва тавсия» муаллифлари, «Энг фаол иштирокчи» номинацияси ғолиблари ташкилотчиларнинг эсдалик совғалари билан тақдирландилар.

Дилбар АСҚАРОВА,
«Turkiston» мухбири

Shunday markaz bor!

Гавжум шаҳарлар бўладими, олис чекка қишлоқларда бўладими, барча гўшаларда ёшларимиз айна ўқиш, касб-ҳунар эгаллаш палласида. Уларнинг орзу-истаклари, мақсадлари ҳам улкан ва ҳавас қиларли. Ҳукуматимиз томонидан яратилаётган имконияту шароитлар уларнинг ана шу муроду мақсадига мос ва ҳамоҳангдир. Жойларда фаолият кўрсатаётган «Ёшлар ижтимоий хизматлари» марказлари фаолияти бунга бир мисол бўлади.

Осон ва пухта ўрганишни устаганлар учун

Жиззах вилоятида бешта ана шундай марказ бор. Улар Янгибод, Фориш, Пахтакор, Мирзачўл туманларида ҳамда Жиззах шаҳрида жойлашган.

— Инглиз тили тўғрагани бошқараман, — дейди Ҳаракатнинг Пахтакор тумани кенгаши қошидаги ЁИХМ раҳбари Дилафрўз Бегматова. — Ҳозир ўттиз олти нафар аъзозимиз бор. Ўтган 2012 йилда 150 нафар ёш йигит-қиз ушбу марказда тил ўрганди. Улар атрофдаги маҳалла, қишлоқлардан қатнаб ўқишади. Курсимиз уч ойлик. Бу вақт давомида имкон қадар инглиз тилида сўзлашув ёки инглиз тили фанидан тестларни яхши ўзлаштириб кетишади. Яқинда «Йигит кишига етмиш ҳунар оз» деб номланган ўзбек халқ эртагини инглиз тилига таржима қилдим ва тўғрак аъзоларига ҳавола қилдим. Албатта, бу ҳам ўқувчиларнинг чет тилига бўлган қизиқишини оширади, менимча. Ҳозирда ёзувчи Фарҳод Мусажоновнинг «Бўш келма, Али-

кулов!» номли кинесалар китобини инглиз тилига ўгириш устида ишляяпман. Бундан ташқари, корейс тилини ҳам мустақил ўрганишга киришганман. Ниятим — бу тилни ҳам ўзлаштириб, тўғрак ишини янада ривожлантириш. Ҳаракатнинг туман кенгаши раиси Баҳодир Эштовнинг амалий ёрдами тўғрак ишини жонлантормоқда.

Туман кенгаши мутахассиси Обид Низомовнинг айтишича, тўғрак иши жуда самарали кечаяпти. Нега деганда, тумандаги 9-мактаб ўқувчиси Дилёр Солиев, 8-мактаб ўқувчиси Фаррух Узоқов шу тўғракка қатнаб туман олимпиадасида ғолиб бўлди. Бундан ташқари, бошқа илғор ўқувчилар ҳам ушбу марказга қатнаб туришади. Тўғрак бепул. Шунингдек, кам таъминланган оилаларнинг фарзандлари, ИИБда профилактик ҳисобда турадиган вояга етмаган ёшлар ҳам ушбу марказга жалб қилинади.

— Дилафрўз опадан жуда кўп нарсани — ҳара-

катчанликни, интилувчанлик каби хислатларни ўргандим. Инглиз тилини содда ва раvon услубда ўргатяпти, — дейди Пахтакордаги 2-мактаб ўқувчиси Шаҳбоз Йўлдошев. — Дарсдан бўш вақтларимиз синфдошим Дониёр Элмуродов билан шу марказга шошамиз. Мактабни битирсам, Жаҳон иқтисодиёти ва дипломатия университети қошидаги академик лицейга кириб ўқиш ниятим бор.

Шаҳбоз келажакда элчихоналарда ишлашни орзу қиляпти. Албатта, нияти унга ҳамиша ҳамроҳ бўлсин, деймиз.

Демак, «Ёшлар ижтимоий хизматлари» маркази ана шундай мақсади эзгу ёшлар бошини бириктирибди. Шу боис бўлса керак, Ҳаракат зиммасига юклатилган вазифаларни бажаришда ЁИХМнинг ўрни беқиёс. Ёшлар билан учрашганда бўлиб ўтган суҳбатлар ҳам шундан далолат бериб турибди.

Шоди ОТАМУРОД,
«Turkiston» мухбири

«Yetakchi» yoshlar markazida

Бугуннинг мавзуларида

«Камолот» ЁИХ Марказий Кенгаши ҳузурдаги «Етакчи» ёшлар марказида Республика Миллий ғоя ва мафқура илмий-амалий маркази томонидан «Мафқуравий ҳаётнинг долзарб мавзулари» номли ўқув-тренинг машғулоти ташкил этилди.

Йил давомида республика бўйлаб ўтказилиши режалаштирилган ушбу тренингнинг дастлабки семинар машғулоти «Камолот» ёшлар ижтимоий ҳаракатининг Тошкент шаҳри ва Тошкент вилоятидаги туман кенгашлари бош мутахассислари ва етакчилари учун ўтказилди. Машғулотлар, асосан, Президентимизнинг 2013 йил 18 январдаги 2012 йилда мамлакатимизни ижтимоий-иқтисодий ривожлантириш яқунлари ҳамда 2013 йилга мўлжалланган иқтисодий дастурнинг энг муҳим устувор йўналишларига бағишланган Вазирлар Маҳкамасининг мажлисидаги маърузаси ҳамда «Обод турмуш — фаровонлик белгиси», «Бош мақсадимиз — кенг кўламли ислохотлар ва модернизация йўлини қатъият билан давом эттириш» каби йирик

мавзудаги маърузалар бўйича алоҳида дарс сифатида ўтилди. Мавзулар тренинг иштирокчиларида катта қизиқиш уйғотди. Улар ушбу мавзуларда ўз фикр-мулоҳазаларини эркин баён этиб, бугунги яратилаётган шароитлардан самарали фойдаланиш лозимлиги борасида кўплаб таклифларни билдиришди.

Машғулотлар Миллий ғоя ва мафқура илмий-амалий маркази, Маънавият тарғибот маркази ҳамда «Етакчи» ёшлар марказининг малакали тренерлари томонидан олиб борилди.

Ўқув-тренинг якунида иштирокчилар сертификатлар билан тақдирланди.

Камола ИСМОИЛОВА,
«Етакчи» ёшлар маркази бош мутахассиси

Boshlang'ich tashkilotlarda

Янги ташаббус — яхши ташаббус

«Ўзметкомбинат» ОАЖдаги 1-навли прокат цехида меҳнат қиляётган ёш ишчи ва ходимлар учун металлургия йўналиши бўйича ўқувлар ўтказилмоқда.

Мазкур ташаббус корхонадаги «Камолот» ЁИХ бошланғич ташкилоти фаол аъзоси, «Ўзбекистон белгиси» кўрак нишонни соҳиби Жамол Файзуллаева тегишли. У лойиҳа муаллифи бўлибгина қолмай, ёш ҳамкасблари учун ўқув машғулотларини ҳам ўзи олиб борапти.

Ҳозир Жамол Москва пўлат қотишмалари институтининг аспирантура бўлимида таҳсил олиш билан бирга, 1-навли прокат цехи бошлиги лавозимида фаолият кўрсатмоқда.

— Ишлаб чиқариш корхоналарида малакали ёш мутахассислар жуда қадрланади. Цехимизда бундай ёшлар кўп. Лойиҳа орқали уларга ўз мутахассислиги бўйича билим ва малакаларини янада оширишлари учун ёрдам беришни мақсад қилдик. Яна бир муҳим жиҳат шундаки, ўқув машғулоти ёшларни ўзлари устида кўпроқ ишлашга, металлургияга оид янги адаби-

ётларни мутолаа қилишга ундамоқда, — дейди Жамол Файзуллаева.

Ёш металлургиялар учун ўқув машғулоти уч ой давом этади. Лойиҳа якунида иштирокчилар имтиҳон топширишлари керак. Истиқболда 1-навли прокат цехи ишчилари учун механика ва бошқа соҳа йўналишлари бўйича ҳам ўқувлар ташкил этиш ва, умуман, янги ташаббусни бутун комбинат миқёсида оммалаштириш кўзда тутилган.

Бехзод КОДИРОВ,
«Ўзметкомбинат» ОАЖдаги «Камолот» ЁИХ бошланғич ташкилоти етакчиси



Ватан каби мангу Навоий

(Давоми, боши 1-бетда)

— Навоий ижодини қанча ўргансак, шунча оз, — дейди Тошкент давлат аграр университети талабаси Шаҳбоз Қосимов. — Чунки Навоийнинг асарларини қанча кўп ўқисангиз, шунча кўп маънавий озуқа olasiz. Бугунги тадбирда тенгдошларимга бобо-

миз қолдирган ғазалларни инглиз тилида ўқиб бераман. Дўстимиз Нуршод Рамазонов эса Фарход ролини ижро этади. Бундай навоийхонлик кечаларини фақат унинг таваллуд кунини эмас, балки йил давомида ўтказиб борсак, биз, ёшлар учун янада фойдалироқ бўларди, деб ўйлайман.

Мир Алишер Навоий

бобомиз ортиқча таърифу тавсифга муҳтож бўлма-са-да, ул зот ҳақида Президентимиз томонидан берилган қисқа ва чиройли таърифни келтириб ўтмоқчимиз: «Агар бу улуг зотни авлиё десак, у авлиёларнинг авлиёси, мутафаккир десак, мутафаккирларнинг мутафаккири, шоир десак, шоирларнинг султониридир». Дарҳақиқат, шеърини султониининг ҳеч

кимга ўхшамас серқирра ижодини ҳар бир авлод янгидан кашф этаверади, ўрганаверади. Зеро, Ўзбекистон халқ шоири Сирожиддин Саййид айтганидек, «Ватан каби поёни йўқдир, Ватан каби мангу Навоий».

Рустам ЮСУПОВ,
«Turkiston» мухбири.
Сардор Муллажонов олган суратлар

ПРОФИЛАКТИКА — ГИЁХВАНДЛИККА ҚАРШИ КУРАШИШНИНГ ТАЪСИРЧАН УСУЛИ

Ўзбекистонда мустақилликнинг илк йилларидан наркогуруҳларнинг ноқонуний фаолиятига барҳам бериш, контрабанда каналларини ёпиб қўйиш, таркибда гиёхвандлик моддалари бўлган экинларни йўқ қилиш, шунингдек, гиёхвандликнинг олдини олиш бўйича таъсирчан чораларни амалга ошириш масалаларига катта эътибор қаратиб келинмоқда. Жумладан, наркотикларга қарши курашни кучайтириш ва улар тарқалишининг олдини олиш мақсадида шу йилнинг 1 февралдан 1 мартгача мамлакатимизда ёшлар ўртасида гиёхванд моддаларнинг тарқатилишига қарши кураш ойлиги ўтказилмоқда.

Ойлик доирасида жойларда гиёхванд моддаларни тарқатиш, сотиш ва истеъмол қилиш билан боғлиқ ҳуқуқбузарликларнинг олдини олишга йўналтирилган тушунтириш ишлари, профилактик мулоқотлар, давра суҳбатлари ўтказилмоқда, маърузалар ўқилмоқда. «Ўзбекистон ҳаво йўллари» Миллий авиакомпаниясининг шўъба корхонаси — Махсус авиация ишлари авиакомпанияси ишчилари ва ходимлари иштирокида ўтказилган «Гиёхвандлик — аср вабоси» мавзусидаги тадбир шулар жумласидандир. Мазкур тадбир Ўзбекистон Республикаси Ички ишлар вазирлигининг Транспортдаги ички ишлар бошқармаси инсон ҳуқуқларини ҳимоя қилиш ва юридик таъминлаш бўлими томонидан ташкил қилинди.

Таъкидланганидек, ҳозирги пайтда барча мамлакатларда гиёхвандликка қарши кураш долзарб аҳамият касб этмоқда. Маълумотларга кўра, ҳар йили ўн минглаб одамлар гиёхвандлик туфайли ҳаётдан кўз юммоқда. Ўз умрига зомин бўлиш билан бирга, улар қариндошлари ва яқинларининг ҳаётини ҳам барбод этади, жамиятга катта зарар етказиши мумкин. Аксарият ҳолларда гиёхвандлик юқумли касалликлар тарқалишининг сабабчиси бўлиб, ушбу оғу таъсирида турли жиноятларга қўл уради.

Ҳуқуқ-тартибот идораларининг ходимлари семинар иштирокчиларига давлат даражасида олиб борилаётган гиёхванд моддаларнинг ноқонуний айланишига қарши кураш, контрабанда каналларини тўсиб қўйиш, таркибда

гиёхвандлик моддалари бўлган экинларни йўқ қилиш, гиёхванд моддалар тарқатилишининг олдини олиш, бу борада идораларо ва халқаро ҳамкорликни ривожлантириш бўйича амалга оширилаётган аниқ мақсадли комплекс чора-тадбирлар ҳақида сўзлаб берди. Жумладан, 1995 йилнинг февралда мамлакатимиз БМТнинг 1961 йилдаги Наркотик воситалар тўғрисидаги, 1971 йилдаги Психотроп моддалар тўғрисидаги ва 1988 йилдаги Наркотик воситалар ва психотроп моддаларнинг ноқонуний айланишига қарши курашиш тўғрисидаги Конвенцияларига қўшилди. 1999 йилда Ўзбекистон Республикасининг «Гиёхвандлик воситалари ва психотроп моддалар тўғрисида»ги қонуни қабул қилинди.

Таъкидландики, Наркотик моддалар устидан назорат қилиш бўйича Ўзбекистон Республикаси Давлат комиссияси ва унинг ижроия органи бўлган Вазирлар Маҳкамаси ҳузуридаги Наркотик моддаларни назорат қилиш миллий ахборот-таҳлил маркази, ҳуқуқ-тартибот органлари, бошқа ваколатли вазирликлар ва идоралар томонидан амалга оширилаётган саъй-ҳаракатлар натижасида мамлакатимиз ҳудуди орқали ўтаётган гиёхванд моддалар транзити оқимини камайтиришга эришилмоқда. Наркотик моддаларни суистеъмол қилишга ва уларнинг ноқонуний айланишига қарши курашиш бўйича 2011-2015 йилларга мўлжалланган комплекс чора-тадбирлар дастури доирасида кенг қўламли профилактика ишлари

олиб борилмоқда.

Бу борада халқаро ҳамкорликка катта эътибор қаратилаётир. Жумладан, Ўзбекистон Республикаси аъзо бўлган Шанхай Ҳамкорлик Ташкилотининг вазифаларидан бири наркотикларнинг ноқонуний айланишига қарши курашишдир. Мамлакатимиз Наркотик воситалар, психотроп моддалар ва уларнинг прекурсорлари ноқонуний айланишига қарши кураш бўйича Марказий Осиё минтақавий ахборот-мувофиқлаштириш маркази ишида ҳам фаол қатнашмоқда. Тошкентда Бирлашган Миллатлар Ташкилоти наркотиклар ва жиноятчилик бўйича бошқармасининг Марказий Осиёдаги минтақавий ваколатхонаси фаолият кўрсатмоқда. Ўзбекистон, шунингдек, Европада хавфсизлик ва ҳамкорлик ташкилоти (ЕХХТ), Жаҳон боғжона ташкилоти, Интерпол каби нуфузли халқаро тузилмалар билан ҳамкорлик қилмоқда.

— Ҳозирги пайтда Ўзбекистон наркотикларни назорат қилиш бўйича 9 халқаро лойиҳани амалга оширишда иштирок этмоқда, — дея таъкидлади Ўзбекистон Республикаси Ички ишлар вазирлигининг Транспортдаги ички ишлар бошқармаси инсон ҳуқуқларини ҳимоя қилиш ва юридик таъминлаш бўлими бошлиғи Суннат Шеров. — Ушбу лойиҳалар доирасида республикамизнинг ҳуқуқ-тартибот идоралари ва бошқа манфаатдор вазирликлар, идоралар ва ташкилотларнинг 300 нафардан зиёд ходимлари учун 30 дан ортиқ тренинг ва курслар ташкил қилинди. Соҳани назорат қилиш ва текшириш техник воситалари, компьютер жиҳозлари ва бошқа ашёлар билан таъминлашга қаратилган ташкилий-амалий чора-тадбирлар кўрилди.

Тадбир доирасида наркотик воситалар ва психотроп моддалар билан боғлиқ аянчли оқибатлар ҳақида ҳикоя қилувчи ҳужжатли фильмлар намойиш қилинди.

Сардор ТОЖИБЕВ,
ЎЗА мухбири

Маънавият уммони

«Камолот» ёшлар ижтимоий ҳаракати Самарқанд вилояти кенгаши ташаббуси билан вилоятнинг барча гушаларида ғазал мулкининг султони Низомиддин мир Алишер Навоий таваллудининг 572 йиллиги муносабати билан қатор маънавий-маърифий тадбирлар, адабий-бадий ва навоийхонлик кечалари ташкил этилмоқда.

Шундай тадбирлардан бири Самарқанд шаҳрида «Аждодлар мероси ёшлар шуурида» шиори остида ўтказилди.

Умри давомида эл дарди билан яшаган, халқ жонига дармон бўлган улуг аждодимизнинг қолдирган маънавий меросини ёшларимиз онги ва қалбига синдириш, унинг асарларидаги тарбиявий жиҳатларни, қолаверса, ўзбек ва жаҳон адабиётига қўшган бебаҳо ҳиссасини англаш, улуг аждодларимиз ижодининг жаҳондаги мавқеи билан фахрланиш, ғурур ва ифтихор ҳиссини уйғотиш мақсадида ташкил этилган мазкур тадбир эрта тонгдан бошланди.



Тонгда Алишер Навоий номидаги маданият ва истироҳат боғида улуг мутафаккир ҳайкали пойида «Навоий ижоди — маънавият уммони» мавзусида навоийшунос олимлар иштирокида ғазалхонлик учрашуви ўтказилди. Тадбир меҳмонлари ва навоийшунос олимларнинг бугунги кунда ҳар бир ёшнинг ўз олди-га қўйган улкан мақсадларига эришиш йўлида, уларнинг ақдан етук, маънавий баркамол бўлиб шаклланишида буюк аждодимизнинг эл манфаати ва халқпарварлик тўғрисидаги ижод намуналари хусусидаги мулоҳазалари ёшларимизнинг Навоий ижодига бўлган қизиқишини янада орттирди. Шундан сўнг тадбирда қатнашаётган ёшлар Алишер Навоий ғазалларидан ўқиди.

Куннинг иккинчи ярмида вилоят «Ёшлар маркази»да Навоий ҳаёти ва ижодига бағишланган «Навоий сиймоси менинг наздимда» мавзусида расмлар, миллий хунармандчилик намуналари кўргазмаси ташкил этилди. Кўргазмада ёш хаваскор рассомлар ижод намуналарида ўз тасаввурларида ғазал мулкининг султони Навоий сиймоси ва у яратган дostonлардаги образлар тасвирини тенгқурларига ҳавола этишди. Кўргазма давомида Навоий ғазалларидан қуйилган қўшиқлар томошабинлар кайфиятига ўзгача шуқуқ бағишлади.

Расмлар кўргазмасидан сўнг йиғилган ёшлар ва меҳмонлар «Ёшлар маркази» биносининг кичик залига — «Навоий ижоди — маънавият уммони» мавзусидаги бадий кечага таклиф этилди. Давра суҳба-тида Ўзбекистон Ёзувчилар уюшмаси вилоят бўлими масъул котиби Ориф Ҳожи ва навоийшунос олимлар иштирок этишди. Сўзга чиққанлар тадбирда буюк аждодимизнинг бизга қолдирган меросининг инсон маънавий камолотидаги беқиёс аҳамиятли жиҳатларини очиб беришди.

Жасур РАҲМОНОВ,
«Turkiston» мухбири

Хаммаси жума кунги йиғилишдан бошланди. Ушанда Малика Зоҳидова коллеж «Камолот»га етакчи этиб сайланди. Шаҳардан келган раҳбарларга ҳам бу номзод маъқул тушди. Ўқувчилар ўртасида дув-дув гап, муҳокама кўзгалди. Баъзилар Маликани етакчиликка муносиб кўришса, кўпчилик лаб жийирар, бу вазифага ўғил болалар ичидан танлаш керак, деб эътироз билдиришар эди.

Малика бизга бақамти гуруҳда ўқийди. Чиройли, одобли ва билимдон қиз. Камтар, камсуқум бўлгани учун ҳам етакчиликни эплаб кетишига кўпчиликнинг кўзи етмас эди.

«Малика директорнинг қариндоши, шунинг учун уни сайлашди-да», — деб шивирларди оғзига кучи етмаганлар. Уларни қўллаб-қувватловчилар ҳам топила қоларди:

«Бу бекорга эмас, «Камолот»чиларга келажакда кў-ўп имтиёзлар берилар экан...»

Мен ҳам, тўғриси, «Камолот» етакчиси ўғил бола бўлиши лозим, деб ҳисоблардим. Масалан, бизнинг гуруҳда ўқийдиган Қаҳҳор муносиб номзод. Аълочи, гапга чечан, биллаклари ҳам бақувват. Коллеж ўқувчиларининг кўпчилиги унга қулоқ солади, ортидан эргашади. Қаҳҳорнинг ўзи ҳам етакчиликка сайланишдан умидвор бўлган шекилли, ўша йиғилишдан сўнг анча тунд ва тажанг болага айланиб қолди.

«Кўявер, — деб аллаким унга жонкуярлик кўрсатди гўё, — орқанга суюнчигинг бўлмагандан кейин аҳвол шу-да. Сен ҳар томонлама муносиб эдинг.»

Бундай пишангдан сўнг Қаҳҳор баттар тутакди.

«Кўрамиз ҳали қандай етакчилик қилишини! Айтганини қилдиришмай ҳар бир боланинг кетидан бурнини оқизиб чопиб юради...»

Гуруҳдошимиз ўша кундан бошлаб ўқувчиларни Маликага бўйсунмасликка зимдан гиж-гижлай бошлади. Шавкат исмли бола йўригига юрмаган шекилли, бир неча кун кўзининг ости кўкариб юрди. Кимда-ким айтганимни қилмас, шу аҳволга тушади, дегандай Қаҳҳор ўзича керилиб кўярди. Шу тахлит ҳаш-паш дегунча орадан икки ой ўтди. Коллежда дарслар, жамоат ишлари кизгин паллага кирди. Бир куни коллеж директорининг ўринбосари Майна Рўзиевна Маликага топшириқ берди.

— Учинчи курс болалари-

ни шанбаликка олиб чиқасан. Поликлиника ҳовлисини супуриб-сидириш керак, дарахтларни бутуқлаш, тағларини чопиқ қилиш зарур. Қани, ташкилотчилик кучингни би-ир кўрсат-чи, ўргилай.

Майна Рўзиевна алланечук пичинг билан гапирарди. Афтидан, Маликанинг сайланиб қолганидан у ҳам норози эди.

Кўпчилик одатдагидай Қаҳҳорнинг фитнасига учди, баъзилар шунчаки ялқовлик қилди, хуллас, бизнинг гуруҳ хашарга чиқмасликка келишиб олди. Лекин мен бордим. Чун-

— Вой, нега ҳали ҳам анқайиб турибсила, тезроқ ишга киришмайсанларми? — деб Маликага ўшқирди у, сўнг яна сўради, — қолганлар қани?

— Ҳозир етиб келишади, — деди Малика.

— Хўп, яхши... Мен бир-икки соатдан сўнг тагин хабар оламан. Ушангача ишни дўндириб қўйинглр. Ҳозир борадиган зарил жойим бор.

Майна Рўзиевна таманно билан яна қайтиб кетди.

Уша маҳмадона қиз Маликага таажжуб билан тикилди.

— Майна опага нега шико-

супур-сидирга аралашар, гоҳ қўлига белкурак олиб дарахтлар тагини юмшатишга киришиб кетарди. Баъзан кафти орти билан юз терларини артиб, бизга ҳамишагидек гуноҳ-корона жилмайиб кўярди.

Ҳашар пешингача давом этди. Бу орада кўп юмушни дўндирдик. Қилган ишларимизга қараб ўзимиз ҳам роса севиндик. Чинакам меҳнат одамага фақат қувонч бағишлайди, деб айтган донишмандлар ҳаққа ўхшайди.

— Эй, — дея Маликани ўзига қаратди қизлардан бири кетар

МАЛИКА

ҲИКОЯ

ки Малика иккимиз яхши муносабатда эдик. Уни хафа қилиб қўйишни истамасдим. Супургини кўлтиқладим-у поликлиника ҳовлисига чопдим.

Кўзнинг ҳорғин ва хира кунларидан бири эди. Ҳаво совуқ. Яланғоч дов-дарахтлар алланечук дийдираб тургандай туюлади. Оёқ остида сарғиш-қизғиш хазонлар шитирлайди.

Поликлиника ҳовлиси жимжит эди. Малика уч-тўрт гуруҳдоши билан дарвоза ёнида хомуш турарди. Аҳволни кўриб-билиб турган бўлсамда, ҳамдардлик юзасидан:

— Болалар келишмадимми? — деб сўраган бўлдим.

Малика ўйчан бош чайқади. — Келишмасе ҳам майликуя, лекин қилган номардликларини қара, — деди қизлардан бири нариги тарафга ишора қилиб.

Мен шундагина бетон ариқ бўйида тўкилган-сочилган чиқит уюмларини кўрдим. Исқирт бир челак сал нарида тўнкарилиб ётарди.

— Буни ким қилибди?

— Сенинг гуруҳдошларинг, — деди тагин ўша қиз, — икки ўғил бола шу ерга «мусор» сочиб кетибди. Қоровул айтди. Унинг ҳай-ҳайлашига ҳам қарашмабди.

«Қаҳҳор... ўшанинг иши бу», хаёлимдан лип этиб ўтди менинг.

Шу пайт Майна Рўзиевна ҳаллослаб етиб келди.

ят қилмадинг? Вазиятни тусунтирмадинг? Бу аҳволда ишлаб бўладими?

Малика хокисоргина жилмайиб елка учириб қўйди.

— Замдиректорга айтганининг фойдаси йўқ, — дедим мен ҳам етакчимизга ичим ачиб, — яхшиси, Матлуба опага ҳисобот ёзиб кирган маъқул. Ҳисоботда кўрқмай, ҳаммасини очиқ-ойдин кўрсатиш керак. Менимча, директор бунга бефарқ қарамайди. Душанба кунги «линейка»да ҳамма бузғунчиларнинг адабини бериб қўяди.

— Тўппа-тўғри! — дея қизлардан бири мени қўллаб-қувватлаган бўлди.

Малика бош ирғаб қўйди.

Биз ҳашарга киришдик. Мен йўлақларни супура бошладим. Икки қиз бурунларини жийириб болалар тўкиб кетган ўша чиқитларни йиғиштиришга уннади. Бу орада нариги гуруҳдан яна икки ўғил бола келиб сафимизга қўшилди. Улар одатдагидай ишдан кўра кўп гапириб, бизларни кулдиришга, тўғрироғи, кўнглимизни кўтаришга ҳаркат қилишди. Шунисига ҳам раҳмат.

Мен аҳён-аҳёнда Маликага эътибор бериб кўярдим. Назаримда, у бизларни овора қилиб қўйганидан, ҳашарга келмаганларнинг ўрнига ҳам ишлатаётганидан хижолатда эди. Унинг ўзи кўпроқ юмушни бажаришга тиришарди. Гоҳ

пайтимиз, — директорга очиқ ҳисобот ёзиш эсингдан чиқмасин. Бизни мақтамасанг ҳам майли, лекин бузғунчиларни фош қил!

Малика яна одатдагидек илжайиб бош ирғаб қўйди.

Ниҳоят, орзиқиб қутилган душанба ҳам етиб келди. Уша кун ҳаво булутли ва анчагина совуқ эди. Кўқда қора қарғалар бўғиқ қағиллаб қанот қоқишарди.

Мен одатдаги эрталабки йиғин бўлмасе-я, деган хавотирда эдим. Аммо коллеж директори Матлуба Асроровна интизомда қатъий турди. Ҳамма гуруҳлар жой-жойини эгаллаб саф тортишди. Матлуба опа ичкаридан чиқиб келди. Ёнида бир неча ўқитувчилар қўл қовуштириб турарди. У ҳамишагидек умумий масалалар юзасидан сўз юритиб, ниҳоят, гапни ҳашарга бурди.

— Шанбалик уюшқоқлик билан, кўтаринки кайфиятда ўтди. Поликлиника бош шифокори шахсан менга кўнғироқ қилиб миннатдорлик билдирди. Юзимизни ёруғ қилганларингиз учун раҳмат, болалар! — Матлуба Асроровна шундай дея қўлини кўксига қўйди, сўнг қўлидаги қоғозлардан бирига кўз ташлаб, гапида давом этди. — Коллеж «Камолот»ининг етакчиси Зоҳидова ўз ҳисоботида жонкуярлиги, ҳалоллиги билан ажралиб турган ўқувчиларни санаб ўтган, жумладан, Ибрагимов!

Yoshlar ijodi

Икки бола билан бир чеккада хиринглашиб, турткилашиб турган Қаҳҳор ўз исм-шарифини эшитиб анқайиб қолди.

— Ибрагимов, — деб такрорлади директор ўқувчиларга бир-бир кўз югуртиб, — қани у? Ўқишга келганми?

Қаҳҳор ажабланган қўйи ўртага чиқди. Ўқувчилар ҳам ҳайрон, гоҳ директорга, гоҳ Ибрагимовга қарашади. Айниқса, ҳашарда қатнашган болалар ҳангу манг қотиб қолишди.

— Балли, ўғлим, — деди Матлуба Асроровна Қаҳҳорнинг қўлини қисиб, — ҳақиқий ўғил бола шундай бўлиши керак. Ҳамиша суюнчик, кўмакчи бўлиши лозим. Зоҳидова ана шу хислатларингизни алоҳида кўрсатган.

Қаҳҳор димоғида хижолатомуз ғудраниб, бош эгиб қолди.

Эрталабки йиғин тугади. Ўқувчилар коллеж ичкарисини томон тўп-тўп бўлиб юришди.

Биз-ҳашарда қатнашган болалар «дува» Маликани ўраб олдик. Ҳаммининг кўзида норозилик учкунлари липиллаб турарди.

— Эй, нега ундай қилдинг?! Томинг кетмаганми, ишқилиб?!

— Меҳнатни биз қилиб, мактовни бошқа биров эшитадими?

— Сен етакчиликка нолойиқсан! Сен — кўрқоқсан! Ибрагимовдан ўлардай чўчигансан!

Малика таъна-дашномларимизни индамай, хаёлчан бош эгиб эшитиб турарди. Унинг бу қилиғи баттар жаҳлимизни чиқарарди.

— Йўқ, Малика кўрқоқ эмас!

Биз товуш келган томонга ялт этиб юзландик. Қаҳҳор! У бизларни суриб ўтиб «Камолот» етакчисининг ёнига борди.

— Малика, мени кечир. Бундай бемаънилик бошқа такрорланмайди. Илтимос, кечир. Сен чиндан ҳам етакчиликка лойиқ, ҳақиқий малика экансан! Энди ҳамиша сенга елкадош бўламан.

Малика жилмайган қўйи бош ирғади. Биз чапак чалиб юбордик.

Муборак РУСТАМОВА, Жаҳон иқтисодиёти ва дипломатия университети қошидаги академик лицей ўқувчиси

СЕНИ ХОТИРЛАБ

Ёшлигимда муҳаббатнинг сирлигин англамабман,
Бу дунёда айрилиқ ҳам борлигини пайқамабман.
Энди йўқсан, нигоҳинг ва кулгиларинг соғинаман,
Тушларимда кўриб гоҳ сен томонга талпинаман.

Бахтли эдик, суюқлигим, ширин онлар оғушида,
Табиатнинг баҳор, ёзи ҳамда кузи ва қишида.
Овозингни яна кўпроқ, гоҳ-гоҳида тингламабман,
Сиймонгни ҳеч кўрмасликни, қора кўзим, мен билмабман.

Ёдимдадир меҳринг кучи, сен-ла кечган осуда дам,
Шўхликларинг, мағрурлигинг, ақл-идрок, табассум ҳам.
Қизимизнинг кулгисидан иболаринг, сенинг аксинг,
Вужудидан шижоатинг, жисми жонинг, тоза қалбинг.

Эрта тонгда чиқса қуёш зарҳал нурли сабо билан,
Булоқ суви жилосида мавжланасан кулимсираб.
Тунда ойнанинг пешонасин ўпиб ўтса париваш лаб,
Борлигинга ишонаман дуоғўйинг пичирлар лаб.

**Саид РЎЗИЕВ,
Сирдарё**

ЧУМОЛИ

Чумолилар тўрт-беш эмас,
Минг-минг бўлиб яшашар.
Неки бўлса ўртада,
Биргаликда ошашар.

Ишдан келса дадаси,
Кутиб олар чумоли.
Дуо қилар момоси:
«Бўл ували-жували».

Дадаси дер: «Қишга деб,
Арпа ғамлаб қўйганман».
Ойиси дер: «Тез чиқинг,
Кўк чой дамлаб қўйганман».

Минг-минг бўлиб юрса ҳам,
Билмас уруш-талашни.
Ўрганайлик, одамлар,
Чумолидек яшашни.

Nafis tuyg'ular

ОМОННИНГ МЕҲМОНДЎСТЛИГИ

Келганда меҳмон,
Еб тўймас Омон,
Тўйиши мумкин,
Конфетга шу он.

Конфет егиси
Келганда Омон,
Бўлар-бўлмасга
Чақирар меҳмон.

**Дилнавоз НАЖИМОВА,
Чирчиқ шаҳридаги
26-мактаб ўқувчиси**

Изланишлар камолотга етказур

«Мактабга эътибор — келажакка эътибор» деган ақидага қатъий амал қилган «Ўзметкомбинат» ОАЖ мутасаддилари Бекобод шаҳридаги 17-мактабнинг иситиш тизимини янгилаш учун 72 миллион 800 минг сўмлик маблағ эвазига хайрли ишни амалга оширишди. Ушбу мақсадлар учун шаҳар ҳокимлиги молия бўлими ўн миллион сўм маблағ ажратди.

Яхши ва қулай шарт-шароит мавжуд бўлган жойда эса эмин-эркин, ижодкорона меҳнат қилса бўлади. Худди шундай бўлди ҳам. Мактабнинг ўттиздан зиёд устоз-мураббийлари 543 нафар ўқувчига қалб кўри, юрак меҳри ила сабоқ беришяпти. Сифатли таълим беришга астойдил ҳаракат қилишяпти.

«Дарс — муқаддас» дастури асосида ҳамда «Ўрган ва ўргат» тавсиясига биноан ўқув машғулоти олиб бориляпти. Тажрибали устоз Ава Топузова раҳбарлигида ижодий изланишлар олиб бораётган мактабнинг ёш мутахассислари таълимда сезиларли ютуқларни қўлга киритмоқда. Айниқса, устоз-шоғирд аъёнларига изчил риоя этилаётганлиги эътиборга молик. Дарс жараёнида электрон дарсликлардан ва мультимедиялардан унумли фойдаланилмоқда. Бу эса таълим самарадорлигини оширишнинг муҳим омидир.

Ўзбекистон Республикаси Президентининг «Чет тилларни ўрганиш тизимини янада такомиллаштириш чора-тадбирлари тўғрисида»ги қарорини мактаб жамоаси мамнуният билан кутиб олди. Зеро, мактабда чет тилларни, айниқса, инглиз тилини ўрганишга қизиқиш катта.

Мактабда инглиз тили машғулоти

ларининг муваффақиятли олиб борилиши кўп жиҳатдан ўқитувчиларнинг маҳоратига боғлиқ. Бу борада Ирода Расулова ва Дилшода Муҳаммадвалиевадек иқтидорли инглиз тили муаллималарининг саъй-ҳаракатлари ибратлидир. Айнан уларнинг ташаб-



буси билан ўқув жараёнидан ташқари инглиз тилини ўрганиш бўйича ўқитувчилар учун қўшимча дарс машғулоти жадвал асосида ташкил этиляпти.

Ҳозир ўттиздан ортиқ фан ва спорт тўғрақлари ишлаб турибди. Айниқса, «Ёш қаламкашлар» тўғраги аъзоларининг иш фаолияти эътиборлидир. Улар ҳар бир қутлуг сана ва байрамга бағишлаб кўргазмалар ташкил қилишади. «Моҳир кўллар» тўғрагида эса ўқувчилар чиройли нақшлар, юмшоқ ўйинчоқлар, рўзғорбоп буюмлар тикишга ва ясашга ўргатиб борилади. Шу тариқа ўқувчиларнинг ижодкорлик қобилияти ривожлантирилади.

— Олиб бораётган изланишлари-

Ta'lim maskanlarida

миз, иш тажрибамиз ота-оналарга ҳам жуда маъқул бўлмоқда, — дейди биз билан суҳбатда мактаб директори Муҳиддин Қўзибоев. — Яқинда улар ҳомийлигида мактабимиз учун 1 миллион 260 минг сўмлик проектор олиб келинди. Ҳозирда дарс машғулотларини ўтишда ундан унумли фойдаланилмоқда.

Обод турмуш йили муносабати билан мактабда «Дўстлик фестивали» ўтказилади. Унда қардош халқларнинг маданияти, урф-одати ва



Элик йил ширинлик билан

Эстонияда янги қурилган кафе ажойиб таклиф эълон қилди.

Таклифга кўра, ошхонанинг ички қисмини барчага манзур бўладиган даражада кўринишга келтира олган мутахассис-дизайнер пул билан бирга, кафе томонидан элик йил мобайнида текин ширинлик ва қаҳва билан сийланиши ваъда қилинган. Элик йиллик заҳирадаги ширинлик бўлганида ҳам бу тахминан қирқ минг евро дегандир. Ҳозирга қадар талабгорлар анчагина. Улар ичида фан номзодлари қаторида мактабнинг саккизинчи синф ўқувчисини ҳам учратиш мумкин. Тез орада кафе маъмурияти талабгорлардан бирини танлайди. Баҳорнинг бошларида ишга тушиши режалаштирилаётган бу маскан ҳозирдан кўпчиликнинг қизиқишига сабаб бўлди.

Жазосини олди

Кувайт суди мамлакат фуқароси Муҳаммад Ийд ал-Ажмийни мамлакат амири Сабоҳ ал-Ҳамад ас-Сабоҳни «Twitter» орқали ҳақорат қилгани учун беш йиллик қамоқ жазосига ҳукм қилди.

Маълумотларга қараганда, Кувайт конституциясида ҳақорат қилишга нисбатан тақиқ қўйилган. Муҳаммад ал-Ажмий ушбу тақиқни бузгани сабаб энг юқори жазони олди. Унинг қандай сўзлар ишлатгани ошкор этилмапти. Сўнгги вақтларда «Twitter» саҳифаларида ҳамда турли микроблогларда амирни танқид қилувчиларга қарши кескин кураш олиб борилган. Йилнинг бошида журналист Аяд ал-Ҳарбий ва блоггер Рашид Солиҳ ал-Анзий, «Twitter»даги постлари учун икки йилга озодликдан маҳрум қилинган эди. Рашид Солиҳ ал-Анзий амирнинг шахсан номини келтирмаган бўлса-да, фикрлари мазмуни гап нима ҳақда эканлигини ошкор қилган эди.

Шотландия мустақиллик сари

Шотландия ҳукумати ўз мустақиллигини 2016 йилнинг мартада эълон қилишини маълум қилди.

Шунингдек, қарорда «Шотландия халқининг қадриятларини ўзида акс эттирадиган» конституцияни ҳам қабул қилиш таъкидланган. Мамлакатнинг биринчи вазири Алекс Салмонд британиялик вазирларни референдум тўғрисидаги музокараларга қўшилишга таклиф қилди. Буюк Британия бош вазири Дэвид Кэмерон референдумгача Шотландия мустақиллиги масаласини муҳокама қилмоқчи эмаслигини билдирган.

Британия ҳукумати вакиллари ҳамда Буюк Британиянинг Шотландия масалалари бўйича давлат котиби Майкл Мур маҳаллий ҳукуматга ҳақиқий мустақиллик ушбу ҳудудга иқтисодиётдан тортиб энергетикагача бўлган ҳаётнинг турли соҳаларида айнан нима беришига эътибор қаратишларини маслаҳат берган эди.

Интернет манбалари асосида
Жавоҳир КАРОМАТОВ тайёрлади

Barchinoy izdoshlari

Нафосат ва шижоат эгаси

Ҳавас ҳосилдор тупроққа ўхшайди. Ер бағрига қадалган чўпни ҳам ниҳолга айлантиргани, ўстиргани каби ҳавас инсон қалбини гуллатади. Унга озгина сайқал берилса, эзгу мақсадлар томон етаклайди. Астойдил қилинган меҳнат муваффақият калитидир. Калит қандай қўлга киритилади? Болаликдаги ҳайрат, енгилгина уринишлар орқасиданми ёки яқинларининг сенга билдирган ишончлариданми? Ҳар ҳолда мақсадлар ортида кўз илғамас олис манзиллар бор-ку. Қаҳрамонимиз Муқаддам опа ҳам ана шундай интилишлари йўлида жасоратни дўст билган замонамизнинг пешқадам аёлларидан бири. Инсон ҳаётда яшаркан, нимагадир ишонади, кимгадир суянади, уни умрининг мазмуни деб билади.

Кўринишидан камсуқум, камтар Муқаддам Турғунованинг ишонгани ҳам, суянгани ҳам — спорт.

У 1973 йил 11 июнда Андижон вилоятининг Балиқчи туманидаги Гулистон қишлоғида дунёга келди.

Ота-онаси жингалаксоч, чаққон қизларини Абдуғани Турғунов қўл остидаги волейбол тўғрагига беришга қарор қилишди.

— Волейболга бўлган иштиёқим ёшлигимда уйғонган. Спортга бўлган муҳаббатим туфайли, келажакда мен ҳам спорт мураббийси бўламан, деб ният қилганман, — дейди у. — Уша пайтлари машғулотлардан уйга кеч қайтганимда онам: «Ўғил болаларга ўхшаб кийиниб олиб, эрта-кеч тўп

ортдан югуришни ким қўйибди сенга! Дўппи тикишни, овқат пиширишни ўргансанг-чи қизлардай. Ҳадемай совчилар эшик қоқади. Ишқилиб, борган хонадонингда сени тушунишин-да, деб қайғурардилар. Йўқ, онасининг ташвишлари бекор экан. Ўзи орзу қилганидай турмуш ўртоғи Абдуғаффор ака ҳам спортчи.

Балиқчи туманидаги етти ёшдан етмиш ёшгача бўлган хотин-қизларни спортга жалб қилган бу аёл 2005 йили Бўз педагогика коллежига ҳужжат топшириб, 2008 йили сиртдан битирди. Спортчиларни тайёрлаш баробарида волейболчи қизлар жамоаси билан бир-

галикда кўплаб ютуқларни қўлга киритиб келмоқда.

2009 йили Шаҳрисабзда ўтказилган «Тўмарис» аёллар фестивалида 2-ўринни, 2011 йили Чирчиқ шаҳрида бўлиб ўтган «Соғломлаштириш спартакиадаси»да олий ўрин, 2011 йили Самарқандда бўлиб ўтган «Спорт спартакиадаси»да 3-ўринни эгаллаб, Москва, Сочи, Киев шаҳарларидаги мусобақаларда ҳам фахрли ўринлар соҳибасига айланди.

Спорт мураббийси ўзининг соҳасида қандай ўринга эга бўлса, оилада ҳам шундай.

Қизлари Муаттар, Муаззам ва Муқаддам онаси изидан бориб баскетбол билан шуғулланишмоқда.

Бир сўз билан айтганда, она бахтли оиланинг бахтли бекаси.

Машғулотлар залида кейинги мусобақага тайёргарлик кўраётган жамоа аъзолари ва уларнинг устози Муқаддам Турғуновани кузата туриб, қалбимиз ғурурга тўлади.

Юртимизда Муқаддам Турғунова сингари фидойи спортчи аёллар кўпаяётганидан қувонамиз.

Дурдона МУХТОРОВА,
ЎзДЖТУ талабаси



1 savolga 1 javob

Гуруҳимизда ўқийдиган бир қиз анча пайт дарс қолдирди. Шундан кейин курс раҳбаримиз, унга академик таътил берилди, деб айтди. Ўрта махсус таълим муассасалари ўқувчиларига академик таътил қандай ҳолларда берилади?

Машхура, Тошкент шахри

Ўрта махсус таълим муассасаси ўқувчиларининг таълим стандартларида белгиланган ўқув режаларини тўлиқ ўзлаштиришлари белгиланган дарс соатларида қатнашишига боғлиқ. Мабодо ўқувчи тез-тез дарс қолдирса, бунинг сабаблари аниқланади. Шу йилнинг 27 январидан кучга кирган Ўзбекистон Республикаси Олий ва ўрта махсус таълим вазирлигининг Ўрта махсус касб-хунар таълими маркази, Соғлиқни сақлаш вазирлиги, Маданият ва спорт ишлари вазирлиги, Ўзбекистон Бадий академиясининг қарори билан Ўзбекистон Республикаси ўрта махсус, касб-хунар таълими муассасалари ўқувчиларига академик таътил бериш тўғрисидаги низом тасдиқланди.

Ушбу низомда академик таътил бериш тартиби келтирилган. Бундан кейин академик лицей ва касб-хунар коллежлари ўқувчилари ўқув йили давомида сурункали хасталик туфайли бир ойдан ортиқ вақт давомида дарсларга қатнаша олмаса, саломатлигини тиклаш мақсадида 12 ой муддатга академик таътил берилади. Мазкур таътил муддати ўқувчининг дарсга қатнаша олмаган кунидан бошлаб ҳисобланади. Яна бир нарсани эслатиб ўтиш мумкинки, бир ўқувчига ўқиш давомида икки мартагача академик таътил берилиши мумкин.

Юқорида номи келтирилган ушбу низомга илова сифатида таълим муассасалари ўқувчиларига тиббий кўрсатмалар бўйича академик таътил беришга асос бўладиган касалликлар рўйхати тасдиқланган.

Академик таътил беришда ўқувчининг ота-онаси ёки уларнинг ўрнини босувчи шахслар таълим муассасаси директори номига ариза билан мурожаат қилиб, унга ўқувчи хасталанган пайтларида доимий рўйхатда турган тиббиёт муассасаси комиссиясининг хулосасини илова қилишлари лозим. Ўқувчи академик таътилга чиққан кундан бошлаб бир ой муддат ичида унинг ота-онаси академик таътилни бекор қилиш ва уни ўқишга қайтаришни сўраб ўқув юрти директори номига ариза билан мурожаат қилишга ҳақли.

Академик таътил даврида ўқувчи ўқиган таълим йўналиши (мутахассислик) мабодо тугатилса, ўқувчини шу таълим муассасаси ёки бошқа таълим муассасасига ўқишини мос ва турдош йўналиш (мутахассислик) бўйича кўчириш масаласи ҳам ариза билан бирга кўриб чиқилиши ва ҳал этилиши кераклиги мазкур низомда баён этилган.

Дилбар ХУДОЙБЕРДИЕВА тайёрлади

YON DAFTARCHANGIZGA

Бутун ҳаётни, хусусан, ёшликни ҳам ақлга ишониб топшириш зарур, худди доно васийга топширган каби.

Пифагор

ЎЗБЕКНИ ИЗЛАГАНЛАР НАВОИЙДАН ТОПАРКАН

Илдиждан тўғилган янроқларим тирфайди,
Шода ҳисм эридан қор соғларда шарқрайди,
Бобом бўғизидан «ох» кўзимдан тирқрайди,
Шегр жонидан тўғилгани, дил тубига сакрайди,
Бу ҳалмига зўрдан биров тўғиб қарайди,
Асрлар ҳам бир-бирин одам каби кўрсаркан,
Бунда шегр ўқий десам, кўёш кўзини тўсаркан.

Бунда эй ниятларин янроқ, каби тўғилганлар,
Бир элини хасратини дилда муштдек тўғилганлар,
Асрлар юраида юзлик қандай юганлар,
Эй қанотсиз ўганлар, қуш тилидан ўганлар,
Ҳати оилқ дунёнинг эганини ёганлар,
Олтин қозикқа боқиб сайёҳ ҳам йўл топаркан,
Ўзбекни излаганлар Навоийдан топаркан.

Бобо тўғроқ, шон тўғроқ, илдижим ботиан тўғроқ,
Шафтин тангма бериб, ўзи совқатан тўғроқ,
Сендан ўсан линофини шохидан мен бир янроқ,
Қоронги томонини эритган эй шамъроқ,
Кўрмилгани кўрбаси Худойим илан байроқ,

Уни ҳиллифатуни ел юракдан эсаркан,
Бунда шегр ўқий десам, елканидан сўз босаркан.

Поғларда қор остида менини кўрмилм эслати,
Чўпонинини нима тавоф деб юз бослати,
Эмир тортиан пардалар эсамолинини тўслати,
Шу элини ор-қурури қамолтиндан тошлати,
Елкам эсимирлягани, қанотга ўршлати,
Юракка шегр тўғилса, сўз қанотга дўнаркан,
Хушлик зўғирин қушлар юрт шохига кўнаркан.

Возки, кўрмилм шу дамда бунга бунёд кўрмилмай,
Кўзим юмиб қарасам, бундан Ҳирот кўрмилмай,
Кўзим оиб қарасам, ману ижод кўрмилмай,
Кўзим узмай тикимсам, шундай аждод кўрмилмай,
Кўз ёш билан қарасам, пули сирот кўрмилмай,
Бобо! Кўзларим ёнди, кўрмил шундай тўғилган,
Бундан хал навниҳал линофдан бун оларкан,
Ўзбекни излаганлар Навоийдан топаркан.

Шодмонкул САЛОМ

Бошланишига нима дейсиз?..

2015 йил Австралияда ўтказиладиган футбол бўйича Осиё чемпионати саралаш босқичи I-турида Ўзбекистон миллий терма жамоаси Гонконг терма жамоасини қабул қилди.

Тошкентдаги «Пахтакор» марказий стадионида ўтган ўйин гарчи футболчиларимизнинг тўлиқ устунлиги остида кечган бўлса-да, унда ҳисоб очилмади.

Ўйин якунлангандан кейинги матбуот анжу-

манида иштирок этган меҳмон жамоа бош мураббийи Ким Пан Гон ушбу натижадан хурсанд эканини яширмади.

— Ўзбекистон ва Гонконг футболни солиштириб бўлмайди, биз

шундай кучли жамоага қарши ўйинда дурангга эришганимиздан кўнглимиз тўлди, — деди у. Ўзбекистон миллий терма жамоаси бош мураббийи Миржалол Қосимов ўйин ҳақида гапирар экан, жамоа ҳамиша максимал натижага ҳаракат қилиши, дуранг умуман режада бўлмаганини айтиб, кейинги ўйинларда жамоа ғалабага астойдил

ҳаракат қилишини таъкидлаб ўтди.

Саралаш босқичида терма жамоамиз билан бир гуруҳда қатнашаётган Вьетнам ва Бирлашган Араб Амирликлари терма жамоалари ўртасидаги ўйинда 1:2 ҳисоби қайд этилган. Кейинги тур учрашувлари 22 мартга белгиланган. Уша кун терма жамоамиз БАА меҳмони бўлса, гонконгликлар Вьетнам терма жамоасини қабул қилади.

Элмурод НИШОНОВ,
«Turkiston» муҳбири

Тарихий ёдгорлик	Чора	Игна	Доно, ақли	Нигерия пойтахти	Риоя қилиш	Авто-мобиль қисми	Курорт ўлкаси (Украина)	Ор-номус	Исроил-даги шаҳар	Хўжайин, раҳбар	"Муноси..." б/ф	Қир ювини кукуни	
Ишпоот, иморат	↓	↓	↓	Яшин, чақмоқ	↓	↓	↓	Марокаш пойтахти	↓	↓	↓	↓	
На совук, на иссиқ	→			... Хайём (мута-факкир)	→			Черков сурати	→				
... Зокиров (бастакор)	→			Ҳаммаси, бари	→			Бир йўла	→				
Вақти қаю	→			Ғам-... изтироб	→			Камар	→				
Зайниддин ... (футболчи)	Грозний (шох)	Қатар пойтахти	Инок, тотув	Япония-даги шаҳар	Аро, ораляб	Қишки улов	Шайх либоси	Дилдора Дилдорага...	Туянинг елкаси	Мукам-мал, тугал	Мақтан-чоқ, ҳавони	Бўлимас зарра	РФдаги вилоят
↓	↓	↓	↓	↓	↓	↓	↓	↓	↓	↓	↓	↓	↓
Водий	→			↓	↓	↓	↓	↓	↓	↓	↓	↓	↓
Нихоят, оқибат	→			↓	↓	↓	↓	↓	↓	↓	↓	↓	↓
Симба дўсти (муьт)	→			↓	↓	↓	↓	↓	↓	↓	↓	↓	↓

Тузувчи: Фахриддин Раҳимов

МУАССИС:

«КАМОЛОТ»
ЁШЛАР ИЖТИМОЙ ҲАРАКАТИ
МАРКАЗИЙ КЕНГАШИ

Газета Ўзбекистон
Республикаси
Матбуот ва ахборот
агентлигида 2007
йил 19 апрелда
№ 0242 рақам
билан рўйхатдан
ўтган.



Бош муҳаррир:

Ашуrow Салим Тўраевич

Тахрир ҳайъати:

Баҳодир Фаниев, Меҳриддин Шуқуров (бош муҳаррир ўринбосари — «Turkiston»), Элмурод Нишоннов (масъул котиб — «Turkiston»), Ирина Кочергина (бош муҳаррир ўринбосари — «Молодежь Узбекистана»), Елена Калинина (масъул котиб — «Молодежь Узбекистана»), Рустам Қосимов

Навбатчи муҳаррир:

Юсупов
Рустам
Қўчқорович

Саҳифаловчи:

Рўзиев
Зафар
Хусанович

Газета тахририят компьютер
марказида терилди ва
саҳифаланди.

Манзилмиз: 100083, Тошкент,
Матбуотчилар кўчаси, 32.
Телефонлар: (371) 233-95-97.
Реклама бўлими: (371) 233-79-69
e-mail:turkiston@sarkor.uz

«Шарқ» нашриёт-матбаа акциядорлик
компанияси босмаҳонасида, А-3 форматда
чоп этилди. Ҳажми — 2 босма табоқ.
Корхона манзили: «Буёқ Турон» кўчаси, 41.

Буюртма Г-143.
Адади — 15287

Босишга топшириш вақти — 21.00
Топширилди — 22.00
ЎЗА якуни — 21.40

Офсет усулида босилган.

1 2 3 4 5 6